

**MESYUARAT PERTAMA PENGGAL PERTAMA
DEWAN UNDANGAN NEGERI PULAU PINANG
YANG KEEMPAT BELAS
02 OGOS 2018**

PERKARA : 4(B)(XXIII)12

**SOALAN BERTULIS OLEH AHLI KAWASAN SUNGAI BAKAP
YB. DR. AMAR PRITPAL BIN ABDULLAH**

12. Isu berkenaan dengan Sekolah Kebangsaan Sungai Duri yang mempunyai jumlah populasi yang tinggi tetapi tidak mempunyai kemudahan asas yang mencukupi.
- (a) Apakah yang boleh dilakukan untuk penambahbaikan keadaan sekolah tersebut?
- (b)

**YB. PROF. DR. P. RAMASAMY A/L PALANISAMY
MENJAWAB BAGI PIHAK Y.A.B. KETUA MENTERI**

12. Bilangan pelajar yang semakin bertambah di Sekolah Kebangsaan Sungai Duri disebabkan wujudnya pembinaan kawasan perumahan yang baharu dan juga kehadiran anak-anak kakitangan Penjara Seberang Perai. Sekolah Kebangsaan Sungai Duri merupakan sebuah sekolah yang berusia dan mempunyai keluasan atau kawasan yang terhad. Walau bagaimanapun, pihak Jabatan Pendidikan Negeri Pulau Pinang (JPNPP) dan Pejabat Pendidikan Daerah Seberang Perai Selatan (PPDSPS) tidak pernah mengabaikan pembangunan fasiliti dan kemudahan di sekolah berkenaan.

Pengambilan tanah telahpun dibuat untuk tujuan pembinaan padang permainan sekolah dan ianya dalam proses menunggu kelulusan peruntukan daripada pihak Kementerian Pendidikan Malaysia (KPM). Pada tahun 2015, pihak PPDSPS telahpun membina sebuah surau mini dan bilik guru tambahan bagi memberi kemudahan kepada guru-guru di samping kerja-kerja penyelenggaraan kecil dan baikpulih dilaksanakan. Manakala pada tahun 2016, sejumlah tiga (3) tandas pelajar yang berada di aras

1, 2 dan 3 blok pentadbiran telahpun dibaikpulih. Pada tahun 2017 pula, pihak KPM telah meluluskan peruntukan bagi kerja-kerja penggantian pagar baharu, manakala tahun 2018 juga KPM telah meluluskan peruntukan untuk membaikpulih dua (2) buah tandas pelajar yang berada di aras 1 dan 2 blok kantin dan peruntukan bagi kerja-kerja penggantian paip bekalan yang lama kepada yang baharu.

Melalui Rancangan Malaysia Kesebelas (RMK11) pula, Kerajaan telah meluluskan pembinaan blok bangunan tambahan 4 tingkat yang dilengkapi dengan kemudahan bilik guru, bilik mesyuarat, ruang pejabat pentadbiran baharu, bilik-bilik khas dan bilik-bilik darjah bagi kegunaan pengajaran dan pemudahcaraan kepada pelajar-pelajar. Di samping itu, pihak KPM telahpun meluluskan sebuah bangunan prasekolah yang baharu yang merupakan kelas yang keempat di Sekolah Kebangsaan Sungai Duri. Dengan pembinaan kelas prasekolah baharu ini, seramai 100 orang pelajar prasekolah dapat diambil bagi setiap sesi persekolahan dengan kapasiti seramai 25 orang pelajar dalam setiap kelas.

Untuk perancangan masa hadapan, pihak JPNPP dan PPDSPP sedang dalam proses mengenal pasti sebuah tapak baharu dalam lingkungan 2km daripada sekolah asal untuk dicadangkan pembinaan sebuah sekolah baharu bagi menampung pertambahan pelajar disebabkan pertambahan kawasan penempatan dan juga ke arah menjadikan persekolahan 1 sesi.